

Tutu e táxnūu San Pablu iña ñá ñuú Efesu

Taxnūu Pablu tutú iña ña ntákuinti'xe i, ñá ntoo ñuú Efesu

¹ Xu'u é Pablú u ne, pustru iña Jesúcristú u tsí kuan ō ntío Xuva kō é tēé tsiñu ña ko. Taxnūu ú tutú sá'á iña ña ntáduku ntée Xuva kō, ña ntoo ñuú Efesu, ña ntákuinti'xe i Jesucristu.

² Xuva ko nī Tó'o ko Jesúcristú ne, na nāxnuu viko ña nto. Na tā'xi ña é kuntōo vá'a nto.

É vā'a é kata'xi Xuva ko kuēnta iña Jesúcristu

³ Dōó ka'nu Xuva ko, divi Uvā Tó'o ko Jesúcristu. Dōo tá'xi ña kō é un ntí'i nūu i é vā'a é tuví e dukún kán tsi kúdadii o nī Cristu.

⁴ Tsí di'na dá tuví ñuxiví san ne, nākaxnúu Xuva ko ko kuēnta iñá Cristu vata koo é na ntāntoo ña nima kó, vata koo é ña tuví ka kuétsi ko tē xee o nta'a ña.

⁵ Tsi dóo ntío ña kō ne, nté di'na kaka'an ñá tsí ki'i ña kō é kuvi o i'xā ñá kuenta iña Jesúcristu, vata ō ntío ña.

⁶ Dukuān né, utén uten ntáka'an o tsi dóo ka'nu Xuva kō. Dōo vá'ā o dé ña ni kō. Nā ni dē vini ña da tá'xi ñá ko I'xā ña, ña e dóo kuinima ña.

⁷ Nákakū ñá ko kuēnta iña I'xá ña, tsi éti ña niñi ña kuēnta iña ko. Dē ka'nu iní ña ni kō kuetsí kō, tsi dóo ntío ña kō.

⁸ Nā te un sīin tsi kuinima Xúva ko kō ne, tā'xi ña é kūtú've kō, é ki'in iní ko.

⁹ Tā'xi ña é kūtuni ko nee iña é ntío ña, nuu i é ña ni iní ō, vata ō ntío ña.

10 Sá'ā dé kuení Xuva kō é viī ña dá xēe ntúvi i. Natáká nuu ña é un ntí'i vāta koo é kodo nūú Cristú da nēé ka é iō e dukún kan ni da nēé ka é iō ñuxiví a.

11 É kudad̃i o nī Cristú ne, nākaxnúu Xuva ko ko ūun tsi nte dí'na vata koo é nī'i ko íña ña. Kuān o dé Xuva ko vatā o é vā'á o kuíni ña.

12 Kuān o dé ña vata koo é ntí'i, é dī'na ntí kuinti'xe ntí Cristú ne, vií ntí vata koo é kā'an ñá'a tsi dóo ka'nu Xuva kō.

13 Dīvi ntō dī, dá tekū nto tú'ūn é nuu é ntaā i, dá tekū nto nté koo nakáku nto ne, kuínti'xe nto Cristu. Kudad̃i nto ni ña né, xntēé Xuva ko nto nā'a da tá'xi ña Espíritū Sántū é kunūu ña nima ntó vata o tá'xi ña xu'u ña.

14 Ta'xi Xuva ko Ēspíritū Sántu vāta koo é kūtuni ko tsí vií ntí'xe ña vata o tá'xi ña xu'u ña dá kūvi naki'i ña é un ntí'i nūu i é káduku ntée ña. Kidáā ne, ka'an ñá'a tsi dóo ka'nu Xuva kō.

Kaikán Pablu nta'a Xuva kō é kuē'e ña é na kukī'in iní ña ntákuinti'xe i

15 Dukuān ne, da téku ko tsi dóo ntákuinti'xe nto Tó'o ko Jēsuú ne, tsi dóo ntákuinima nto ta'an ko, ña ntákuinti'xe i Xuva kō ne,

16 ñá kaxtuvī mií u é nakué'e ú sintiá'vi nta'a Xuva ko kuēnta iña nto. Kanaka'ān kó nto dá kakā'an ntā'ví u.

17 Kaikán u nta'a Uvā Tó'o ko Jesūcristú, dīvi Xuva kō, ña e dóo va'á san, te tā'xi ña é kūtú've vá'a nto iña ña, vata koo é kī'in dikí nto é kākā'an ña, vata koo é kīní va'a ntó ña.

18 Kaikán u nta'a Xuva ko te nāxi'í nuu ña nuu nto vata koo é kūtuni ntó nēe é nī'i nto é kāna ña nto. Te tā'xi ña é kūtuni nto tsí ña te nté kaa va'a, ña te nté kaa kuika nuu i iña Xuva ko é kaxé'e ña ña'a é nakuído da'an ñā.

¹⁹ Te tā'xi ña é kūtuni nto tsí ña te nté kaa ka'nu ña. Kakuvi vií ña é un nti'i kuēnta iña kó, ñi ò e ntákuinti'xe ko ñā. Nañē'e ñá kō tsí kuvi vií ña nī é un nti'í

²⁰ dá nantōto ñá Cristú rkontuvi é xi'i ñá ne, xé'e ñā é kutuví ñá ñi kua'a ña e dukún kán.

²¹ Díi ka ka'nu Jesuu é da xōó ka ña tsiñu na'nu i, da xōó ka ña tsiñu i, da xōó ka ña ntádē kú've e dukún kan, da xōó ka ña ntádē kú've ñuxiví a, da xōó ka ña e dóo ka'nu, kuān te ntóo ña vevii, kuān te ntóo ña ntuvi é k'ín o.

²² Ta'xi Xuva kō é kūvi vií Cristu ni é un nti'í. Tā'xi ña é kūvi Cristu tó'o iña un nti'í nti'í nuu i é kāduku ntée ña ntákuinti'xe i san. Cristú ne, ñi ñā é kadē kú've ñá kuenta iña ña ntákuinti'xe i san.

²³ Ña ntákuinti'xe i sán ne, vata ntáa kúñu Cristu ña. Kanuu mé'ñu kanuu dava ña ña ntákuinti'xe i sán ni da kaní dū'va ñuxiví san.

2

Nakākú Xuva ko kō, tsi dóo kakuinima ñá kō

¹ Ta'xi Xuva ko ntuvi vā'á iña nto, ñi ntō é vata ntáa ña xi'i ntáa nto kídaa kuēnta iña kuétsi ntō, dá vata kuinti'xe nto Cristu.

² Dōó ncho vií nto kuétsi kídaā, dá ntikin ntó vata xkoó ini ñá ñuxiví san. Dé ntaa nto é ká'an tó'o e ña vā'ā san, ña é kadē kú've iña é ña vā'ā é ntoo e dukún kán, ñi é káka'an nté koo vií ña'a, ña é ña ncho kuinti'xe i Xuva kō.

³ Kuān o dé o, ñi nti'í nti'í o, kídaā. Éde o da mií é ntio kō. Dē ntaa o é káka'an nima kini ntáa kō, e ntádē kuení kō. Dukuān ne, kantio é ñi'í ko é ntō'o ko e dóo ka'nu é kata'xi Xuva ko, ni ñi nti'í nti'í ka ña'a.

⁴ Ntá tsi un vá'a tsi ntúnta'ví ini Xuva ko kō, tsí ña te nté kaa kakuinima ñá kō ne,

⁵ ta'xi ña ntuvi vā'á iña ko kuenta iñá Cristú, kuān te kantío é nī'i ko doxi'i kuenta iña kuétsi kō. Da mii tsí e dóo va'á Xuva kō é nakakū ñá kō.

⁶ Vata ō ntóto Tó'o ko Jesūcristú ne, kuan ō nántoto ña kó di ne, ta'xi ña é kuntoo dadii o ni ñā e dukún kán, tsi kuínti'xe ko Jesūcristu.

⁷ Kuan ō dé ña vata koo é nañē'e ñá ña'a rkontuví ve tsí un vá'a tsi kakuinima ñá kō, tsi dóo vá'ā ó de ña ni ko kuenta iña Jesúcristu.

⁸ Da mii tsí e dóo va'á Xuva kō é nakakū ñá nto da kuínti'xe nto. Ña túvi nēe nuu i é vīi mii nto é nākáku nto, ntá tsi doméni tá'xi Xuva kō é nākáku nto.

⁹ Ña kúvi vīi o nee nuu i é nākáku ō, vata koo é ña víi ka'nu ō.

¹⁰ Tsí Xuva kō de kú'vē ñá kō vata koo é da ntántikin o Jesuú ne, vīi ō é vā'á, vata ō ka'an Xúva kō nte dí'na é vīi o.

É kuntōo vá'a o kuēnta iñá Cristu

¹¹ Dukuān né, naka'an ntō nte ntáa nto dí'na, divi ntō é ña te ña Israeé nto. Ntáka'an ñá Israeé san iña ntó “ñā'a, ña é ña ni té'nte kúñū é īxi i”, tsi ntántikin ña vata xkoó ini ña e ntaé'nté ña kúñū ña, kuān te mii tsi ñá é'nte ña.

¹² Kidáā ne, váta kīni ntó Cristu. Tuku ña'a nto é ña Israee. Ña túvī nee iña é intétu nto, ntē ña ni iní nto xoo é Xuva kō.

¹³ Ntá tsi vevíi ne, kudadii nto ni Jesūcristu. Divi ntō é ña ni kuvi ki'xi étsin nto Xuva kō kídaā né, ntoo ni'i nto ñā vevii, tsi éti Cristu níñi ña kuenta iña nto.

¹⁴ Tā'xi Cristu é kuntōo vá'a ō, tsí idé ña é ntūdadii ña Israeé san nī ña e ña te ña Israeé san. É nākaán nuu ña mí'i kánti'u kídaā da ntánāa núu ña Israeé san nī ña é ña te ña Israeé san.

15 Dā xi'i ñá ne, nantí'i ñā leí san é kākā'an nté koo vii o, é kadē kû've íña ko. Uun tsi ña'a, ña é xēe, ntáda dadii ña ntuvi ñá'a san, tsi ntákuinti'xe dadii ña Xuva kō. Kuān o dé ña vata koo é kuntōo vá'a ña ni tā'an ña.

16 Dukuān né, dā xi'i ña ntíkā krusi kán ne, nantí'i ña du'xēn é ēdé ntuvi ñá'a san vata koo é kūvi ntuvá'a dadii ña ni Xuva kō. É uun tsi ña'a kúvi ña ve.

17 Vé'xī Cristú ne, ka'an ña nté koo kuntōo vá'a nto, ñi ñā'a san é ñi ñá ña.

18 Kuenta íña ña kuvi kí'in etsin o nuu Xuva ko, tsi é ñi'i ko Espíritu ña, ntuvi ō.

19 Dukuān ne, ñá te ñā tuku ñuú ka nto, ñá te ñā é doto tsi ntaíka ká nto, ntá tsi ña ñuú Xuva ko nto vē. Ña ví'i Xuva ko nto vē ne, dadii xnto ni ñā e ntáduku ntée ña.

20 Vata kaa ví'i san ntáa nto, tsí odo nto nú eti ví'i san. Eti ví'i sán ne, ñi tū'un é nakuā'a pustrú san nī ña ka'án naa Xuva ko. Mii Jesūcristú ne, xuu é odo nūu diñi ntii ví'i san.

21 Xo'ō é kudadii o nī Cristú ne, kuve ta'an o vāta ntáa ntiká nto'o é xí'í ta'an va'a un ntii ntí'í diñi i, da nté ntuvi o xūkún Xuva kō mí'i ña kakí'vi nté uun nuu i é kīni kaa.

22 Ñi ñā ñi, dá kudadii nto nī Cristú ne, kuve ta'an nto nī ña ntákuinti'xe i san vata koo é kūvi nto xūkún Xuva kō, tsí nuu Espíritu ña nima nto.

3

Ñi ñā tsí ñu Pablu é kākā'an ña tú'ūn va'á san nī ña é ña te ña Israe

1 Dukuān ne, xu'u é Pablú u ne, nuu kutū ú kuenta íña Jesúcristu, váta koo é ñi ñā ñi, ña é ña te ña Israeé nto, ní'i ntō é vā'a.

² Á te ĩni nto tsi dóo vá'ā o dé Xuva ko ni kō da tée tsiñu ña ko é kā'án u tú'un ña ni ntō.

³ Tá'xi Xuva kō é kūtuni ko é tuvi xu'u iña ña, vatā o dé vá'a ú di'na é ña kué'e tsi tú'ün é kāka'án u.

⁴ Dā nakua'a nto tú'un tsíkán ne, kūtuni nto tsí iní u nuu i é tuvi xu'u iñá Cristu.

⁵ Dá ntē vevíi ne, ñá ni xē'é Xuva kō é kūtuni ñá'a. Ntá tsi vevíi ne, e xé'e Xuva ko kuēnta iña Espíritū Sántū san é kūtuní pustrú san nī ña ntáka'án naa Xuva ko.

⁶ Sá'ā ne, nuu i é tuvi xu'u kídaā: tsí ña é ña te ña Israeé ne, dadii tsi ni'i ña iña Xuva ko nī ña Israeé san, tsi e kúdadii ña nī ña Israeé san kuenta iña tú'ün va'á san. Ní'i ñā é xē'é Xuva ko xū'u ña di dá kuinti'xe ña Cristu.

⁷ Tēé tsiñu Xuva kō ko é kā'an ntódo u tú'ün sa'a, tsi dóo vá'ā ó de ña nī kó ne, tā'xi ña kó ntii ña vata koo é kūvi víi u tsiñu sá'a.

⁸ Xu'ú ne, dií ka dutsi kaa u é ña e dií ka dutsi kaa é kāduku ntée Xuva kō. Ntá tsi dóo vá'ā o dé Xuva kō, tsi tá'xi ñā é kā'án u nī ña é ña te ña Israeé san tú'ün va'á iñá Cristu é dií ka nuu á'vi é ntē ña ini o nté kaa.

⁹ Ta'xi Xuva kō, ña é de kû've é un ntíi é ĩo, é kā'an ntódo ú vata koo é kīni un ntíi ntíi ña'a nté ō de kú'vē ña é koo nuu i sá'ā e xtúvi xu'u ña un tsi nte dá iñi ntu'u ñūxiví san.

¹⁰ Kuān o dé ña vata koo é kūtuni un ntíi ntíi ña e ntádé kû've e dukún kan tsi dóo ini Xúva kō é un ntíi nté koo vii ña dá kiní ñā ña ntákuinti'xe i san.

¹¹ Un tsi nte dí'na kuān ó ncho víi ña kuenta iña Tó'o ko Jesūcristu.

¹² Kuenta iñá Cristú ne, ini o tsí kuvi xee étsin ō nuu Xuva ko. Tsí te kuinti'xe ko ñā ne, ñá kaū'ví ka ko ñā.

¹³ Dukuān ne, kaka'án u ni nto tē ña nátiivi iní nto é kuān ó kanto'o kó kuenta iña nto. Tsí xu'ú

kanto'o kó vata koo é nī'i nto é vā'a.

Kakuinimá Cristu nto

¹⁴ Dukuān né, kanchitī ú nuu Xuva ko, divi Uvā Tó'o ko Jesúcristu.

¹⁵ Uva ña iña un ntīí ntīí tātá ña'a sán di, kuān té ña ntoo e dukún kan, kuān té ña ntoo ñuxiví a.

¹⁶ Kaikán u te tā'xi ña é kunūu ntii nima ntó kuenta iña Espiritu ñā, tsí ña te nté kaa io é vā'á iña ña.

¹⁷ Kaikán u te kunūu Cristu nima ntó da ntákuinti'xe nto. Na tā'xi ña é kūtú've vā'a nto nté koo kuinima kué'en nto,

¹⁸ vata koo é kūtuni ntó, nī ūn ntīí ntīí ña ntáduku ntée Xuva kō, nté kaa nī'i, nté kaa kani, nté kaa kūnu, nté kaa dūkun kaxee tá'an é kakuinima Xúva ko kō.

¹⁹ Kaikán u te kinī nto nté kaa ntio Cristu kó, kuān té ña kuvi kadá kuení kō tsi dóo ku'e'e, vata koo é kū'un tsitu kue'én nima ntó Xuva kō.

²⁰ Dōó ka'nu Xuva kō. Dōó ió ntii ña é kāde tsiñu ña nima kó ne, kuvi víi ña dií dií ka va'a é kaikan o, dií dií ka va'a é kadā kuení kō.

²¹ Te kā'an ñá'a tsi dóo ka'nu Xuva ko kuēnta iña ña ntákuinti'xe i san, kuenta iña Jesúcristu. Kuān koo ka'an ñá da ntántoo ká ña'a san ñuxiví a ne, ntii dañu ntūvi di. Kuan tsi koo na kōo.

4

É uun tsi kúñū kúvi o kuēnta iña Espiritū Sántū san

¹ Xu'u é nuu kūtū ú kuenta iña Xuva kó ne, kaikán u nta'a nto te víi ntó vatā ó ntio Xuva kō é víi ña e kána ña.

² Nā víi ka'nu nto. Nā ku kudīin nto ni ña'a. Na kūtíi nto kuntētu nto. Na kūtíi nto ni tā'an nto. Na kuñnima ntó ña.

³ Koo ntii ntō é ña xtuví mii ntō é uun tsi ntádē kuení nto vatā ó katá'xi Espíritū Sántū san dá ntoo vá'a nto.

⁴ Uun tsi kúñu nto, ni ūun tsi Espiritu ntō dí, vatā ó ió uun tsi nuu i é vā'a e ntantétu nto é nī'i ntó rkontuvi, nto'o é kána Xuva ko ntō.

⁵ Uun tsi Tó'o kō, uun tsi tú'ūn va'a é kuinti'xe ko, ni ūun tsi nuu i é kutsi ntute o.

⁶ Uun tsi Xuva ko, ðivi Uva ko ūn ntíí ntīi o. ðivi ñā é odo nuū ña é un ntíí ntīi o. ðivi ñā é nuu mé'ñu nuu dava ña ko ūn ntíí ntīi o.

⁷ Ntá tsi é un é un ō ne, é tā'xi Cristu ko nuu i é vā'a é vīi ó, vatā o ntío ña.

⁸ Dukuān ne, kaka'an tú'un Xuva kō:

Da kūntáa ña e dukún kán ne,
ntēka ñá ña ñu'u kutū ne,
xé'e ña nuū i é vā'a é vīi ña'a san,
ka'an.

⁹ ¿Nee iñá ntu kani tu'un é kāka'an é kūntáa ña? Ncho ka'an tsí di'na naínu ña ñu'u a.

¹⁰ Ña e naínú san ne, ðivi tsi ñā é kūntáa ña mí'i e díi ka dukun e dukún kán vata koo é kadā kú've ñá da kanií dū'va.

¹¹ Tā'xi ña nuu i é vīi o, é un é un o. Iō ñá ne, xé'e ñā é vīi ñá pustru. Iō ñá ne, xé'e ñā é kā'an ñá naa Xuva ko. Iō ñá ne, xé'e ñā é kā'an ntódo ña tú'ūn é nakáku ō. Iō ñá ne, xé'e ñā é kadā kú've ñá ña ntákuinti'xe i sán ne, nakuā'a ña ña nchu'ún san ði.

¹² Kuān o dé ña vata koo é koo tú've ña ntáduku ntée ña é vīi ñá tsiñu ña, vata koo é naku'e'nu ña ña ntákuinti'xe i Cristú san

¹³ da nté dadíi tsi kuinti'xe ko, dā nté dadíi tsi ini vá'a o I'xá Xuva kō. Kidáā ne, kuka'xi nuu ō ne, kué'nu ō vata koo é un ntí'i é vīi ó ne, vīi o vatā o dé Cristu.

14 Ñá víi ka o vatā ó de i'xá san é nuu nuu tsi ntánadama e ntádē kuení i. Ntántikín dá nēé ka nchu'un é xēe e ntánañē'e ña ntaéni nta'ví san, ña e dóo ntáde é kīni kaa.

15 Ntá tsi ka'an o é nuu é ntaā í ni ñā'a, tsi ntákuinima kó ña. Kidáā ne, kue'nu ká o un tsi dā nte xee tá'an o víi o vatā o dé Cristu. Divi ñā né, odo nuū ñá iña ña ntákuinti'xe i sán vatā ó odo nuū dikí ko iña kúñu kō.

16 Xo'ō ne, vata káa kúñū Cristu ntáa o, é dóo vá'ā ó xī'i ta'an é un ntíí ntíí ta'ví ī. Te ūn ntí'i tsi ta'ví ī dóo vá'ā ó ntáde tsiñu ne, dóo vá'ā ó kae'nu kanī kúñu ñā. Kuan koo na kuñinima tá'an kō di, un ntíí ntíí o e ntáduku ntée o Cristu.

Ntuvi xēé iña ko e tá'xi Cristu

17 Dukuān ne, kaka'án u ni nto vē, tsí ntio Xuva kō é víi nto sá'a. Ñá víi ka nto vatā ó de ña'a, ña é ña ini Xúva kō. Dotō tsi ntáde ña é ntio nima kíni ntáa ña.

18 Ñinēé ini dikí ña. Ña túvi ntuvi iña ña e tá'xi Xuva kō, tsí ña ntácutuni ña, tsi dóo ka'xi ini ña.

19 Ña ntákuka'an nuú ka ña é da mii tsí e ntáde ña é kīni kaa. Ñá tē nté kaa diní ña é víi ña é un ntíí ntíí nuu i é kīni ntáa san.

20 Ntá tsi divi ntō ne, ñá tē dúkuan ō ni nakua'a nto iña Cristu,

21 tē nuu é ntaā i e téku nto é kākā'an ñá, tē nuu é ntaā i é divi ña nakuā'a ña nto; tsí kaka'an ña é nuu é ntaā i.

22 Vatā ó kanatāva o doo dé'én san ne, kuan koo naxtūví xio nto é ntio nima kíni kaa nto, é da mii tsí e ntaéni nta'ví nto.

23 Kué'e ntō é ntavá'a Xuva kō nima ntó vata koo é vā'á tsi koo kadā kuení nto.

24 Nakunúu nto ntuvi vā'á iña nto é dē kû've Xuva ko iña ko vata koo é víi o vātā ó de ña. Divi ñā

ne, kade ña é vā'á ni ñā'a sán ne, ña túvi nēe é kuētsí ña. Kuān koo vií o di, tsi ntákuinti'xe kō é nuu é ntaā i.

²⁵ Dukuān ne, ñá kā'an ka nto dovéte. Ka'an nto é nuu é ntaā í ni tā'an nto, tsí uun tsi kúnū kúvi o ni ñā.

²⁶ Te kūdiin ntó ne, ntá tsi ña ku vií nto é kīni kaa. Ña na'a tsi kudīn ntó di, na ntūka'nu iní nto di'na dá kuido nuu ngántii.

²⁷ Ntē ña ku xe'e nto é kā'an tó'ō e ña vā'ā san nté koo vií nto.

²⁸ Ña kadú'u sán ne, na xtuvī mii ña é kādu'u ña. Na kōó ntii ña kada tsiñu ña vata koo é nī'i ña é natsī'i ña iña ña ntátaan nuú i san.

²⁹ Ñá kā'an kīni nto, ntá tsi ka'an ntó nēe é vā'á, nēe é kaxntii é kuē'nú ta'an nto vatā ó kantio ña, vata koo é na nāxnuu viko ña ña'a, ña kateku í san.

³⁰ Ña ku vií nto nee iña é kāde i é kuntā'xa iní Espíritu Xuva kō, tsi tá'xi Xuva kō Espíritū san vata koo é kūtuni ko tsi ntáduku ntée o Xuva ko tē xee ntúvi é naki'ī kue'en ñá kō.

³¹ Xtuvī mii nto é dutsī kuiní nto, nī é kakudiin nto. Ñá ku nāa núu ká nto. Ñá ku kāchu'u ntó. Ntē ña ka'an kīni nto iña ta'an nto. Ñá ku vií nto nté uun nuu i é kīni kaa.

³² Ntá tsi vií nto é vā'á ni tā'an nto. Ntuntā'ví ini nto ña ne, kada ka'nu iní nto ni ña vatā ó de ka'nu iní Xuva ko ni nto kuēnta iñá Cristu.

5

Nté koo é vā'á koo kuntoo i'xá Xuva kō

¹ Vií nto vatā ó de Xuva kō, tsí i'xá ña nto e dóo ntío ña nto.

² Utén utén kuinima ntó ta'an nto vatā o kuínimá Cristu ko dá xe'é ña ntuvi iña ña kuenta iña ko. Divi

ñā e kúvi ña doméni e dóo va'a, é vata kaa uun diko e dóo vá'a ñe'e iña Xuva ko.

³ Divi ntō e ntáduku ntée nto Cristú ne, ñá ku kā'an nto nté uun tú'un nuu i é kīni kaa e ntáde ña'a ni ñadī'í san, e ntáde ne'u iní ña ni ñā'a san.

⁴ Ñá ku kā'an nto tú'un dēntu. Ñá ku dotō tsí ka'an ntó, ntē ña doto tsí xkuntée nto nuu i é ña vá'a, tsí ña te vá'a o é kuān koo víi o. Díi ka vá'ā ó te nākué'e o sintiá'vi nta'a Xuva kō.

⁵ Tsí iní vá'a nto tsí da xōó ka ña'a é kakidi ni'í ña ñadī'í é ña te ñádī'í míi ñā né, da xōó ka ña'a é kāde ña é kīni kaa, da xōó ka ña'a é kākune'u iní ña, é kānuu iní ña tuku nuu i é ña te Xuva kó ne, ñá nī'í ña é vā'á nta'a Xuva kō, nté ntā'a Cristu.

⁶ Ñá ku dā vá'a nto é kāni nta'ví ña'a san nto te dotō tsi ntáka'an ñá dovete, tsí kuenta iña i sá'ā ne, kué'e Xuva kō e dóo nto'o ña, da xōó ka ña'a é ña ncho kuintí'xe i ña.

⁷ Ñá ku kudadii nto ni ña kuān ntāa san.

⁸ Divi ntō né, vata te ñinēe mi ntaíka nto kídaā, ntá tsi vevíi ne, é nāxi'í Xuva kō mi ntaíka nto. Víi nto vata tsí ó de ña'a, ña é kaíka mí kaxi'í nuu ñu'u.

⁹ Tsí ña é kānaxi'í nuu í ne, kade ña é vā'a. Kade ña é ntio Xuva kō. Kade ña é nuu é ntaā i.

¹⁰ Koo ntii nto víi ntó nee nuu i é díi ka va'a é víi ntó vatā o é ntio Xuva kō.

¹¹ Ñá ku dotō tsí kini nuu nto nuu i e ntáde ña e ntaíka mí ñinēe, tsí ña kaidiá'vi. Ntá tsi nañe'e ntó ña tsí ña te vá'a o ntáde ña.

¹² Tsi ntákuka'an nuu ko é kā'an o nuu i é ntáde xu'u ña.

¹³ Ntá tsi dā naxi'í nuu ñu'ú san ne, ntii díto nuu i é iō xu'ú, nte ntāa nti'xe.

¹⁴ Tsí ña te nee iña é kuvi koo xu'u dá kaxi'í nuu ñu'ú san. Dukuān ne, kaka'an ña:

Ntoton, divīn é kakidin.

Nakuntínsin mé'ñū ña xi'í san ne,
Cristu naxi'í nuu ña nuu o,
ka'an ña.

¹⁵ Koto vá'a nto nté ò ntáde nto ve. Ñá vii ntó vatā ó de ña tuntú san, ntá tsi vii nto vatā ó de ña e dóo ki'in inī i.

¹⁶ Koo ntii nto kada tsiñu nto vi'a ió ka ntuvi, tsi dóo ió nuu i é kīni kaa ntuvi sā'a.

¹⁷ Dukuān ne, ñá vii ntó vatā ó de ña tuntú san, ntá tsi kutuni nto nee é ntio Xuva kō é vii nto.

¹⁸ Ñá ku de ki'vi ntó tsí dukuān ne, ña kúvi kotō kú've nto. Ntá tsi kué'e nto é kadā kú've Espíritū sán nima nto.

¹⁹ Kata nto nchu'ún ni tā'an nto. Kata nto un ntíí ntíí nuu i é kākā'an tsi dóo ka'nu Xuva kō. Kanīī nima ntó kata nto iña Xuva ko.

²⁰ Nguentúvi nakué'e nto sintiá'vi nta'a Xuva ko iña é un ntí'í da neé ka nuu i kuenta iña Tó'o ko Jesūcristu.

Vata tsi te ñavi'i kō ña ntákuinti'xe i san

²¹ Vií nto é ntio ta'an nto, tsi ntaíko ñu'u ntó Cristu.

²² Dīvi nto, ñadi'í, vií nto vatā ó ntáka'an xíi nto, vatā ó de nto nī Tó'o ko Jēsuu.

²³ Tsi ntádē kú've ñatíí san iña ñadi'í ña, vatā ó kade kú've Cristu iña ña ntákuinti'xe i ña. Dīvi ñā né, kanakakū ñá un ntíí ntíí ña ntákuinti'xe i ña tsí uun tsi kúñū kúvi ña ni ñā.

²⁴ Vatā o ntáde ntaa ña ntákuinti'xe i é kākā'án Cristú ne, kuan koo na káda ntaa ñadi'í san un ntí'í é kākā'an xíi ña.

²⁵ Dīvi nto, ñatíí ne, na kuñnima ntó ñadi'í ntó vatā o kuñnima Cristu ña kuñnti'xe i ña. Tsí xe'é ña ntuvi iña ña doméni kuenta iña ña,

²⁶ vata koo é nākate ña kuétsi ñā é nakutsi ntúte ña ña da kuñnti'xe ña tú'un ñā.

27 Kuān o dé ña vata koo é ntāda ña ña kuenta nta'a mí ñā, é vata kaa ñadĩ'i, ña e dóo vá'a kaa. Dōo vá'a ntí'xe ña vata kaa uun doo e dóo nuu a'ví san é ña tuvi mí'i ni xē'e, ña tuvi mí'i ntútsi'i, ntá tsi vá'a kue'en.

28 Du'vā ó kantio é kuinima ñatĩ san ñadĩ' ñā, vatā ó kakuinima ña kúñu mii ñā. Te kakuinima ñā ñadĩ' ñā ne, kakuinima ña kúñu mii ñā di.

29 Xōxó ñatĩ é ña ntío kue'en ña kúñu mii ñā, ntá tsi kaxé'e ña é kā'xí ne, kade ña i kuenta. Kuān ó kade Cristu ni ña ntákuinti'xe i ña di,

30 tsi ntáduku ntée ña ña. Xo'ō né, kuān o ntáduku ntée o kúñu Cristú di. Tsí dadĩ tsi kúñu kúvi o ni ñā.

31 Dukuān ne, kaka'an tú'un Xuva kō tsí xtuví mii ñatĩ san uva ña ni di'i ñā vata koo é kutĩni'i ña ñadĩ' ñā. Ntuvi ñā ne, uun tsi kúñu kúvi ña, ka'an.

32 Sá'a nūu i e dóo ka'nu, é ña ini o. Ntá tsi kaka'án u sá'ā vata koo é kūtuni nto nté o de Cristu ni ña ntákuinti'xe i ña.

33 Ntá tsi kuinima ntí'xe nto, é un é un nto, ñadĩ' ntó vatā o ntákuinima nto kúñu mii ntō. Ñadĩ' san ne, na kuiko ñu'u ña xñ ña di.

6

1 Dìvi nto, ì'xá, kada ntaa nto e ntáka'an úva nto ni di'i nto, vatā o é ntío Xuva kō. Tsi vá'ā o é kuān koo víi nto.

2 Tsi tú'ūn é kuví ūun é kākā'an é nī'i ko é vā'á te kāda ntaa o ne, kaka'an: “Kuiko ñu'u nto uva nto ni di'i ntō,

3 vata koo é kuntōo vá'a nto, vata koo e dóo kani ntuvi iña nto ñuxiví sa”, ka'an.

4 Dìvi ntō né, uvā, ña kú de nto é na kūdiin i'xá nto, tsí nakuē'nu vá'a nto i. Kué'e nto é ntō'o i te ña vá'a o ntáde ne, kué'e nto i ìtsi nté koo kuntikin Xúva kō.

⁵ Divi ntō, ña ntáde tsiñu ne, kada ntaa nto e ntáka'an tó'o ntō, ñá ntoo ñuxiví sa. Kuiko ñu'u nto ñā. U'vī ntó ña. Kan̄ nima ntó vií nto tsiñu e ntáta'xí ña vata tsi tē ntáde tsiñu nto iña Crístu.

⁶ Kada ntaa nto, ñá te da mii tsī da ntaíto ntáde ña nto, vata koo é kā'an ñá tsi dóo va'á nto, ntá tsi kada ntaa ntí'xe nto vatā ó de ña kade tsiñu iña Xuva ko. Kan̄ nima ntó vií nto vatā ó ntio Xuva ko.

⁷ Vií nto tsiñu nto n̄̄ kue'én ini nto, vata tsi te iña Xuva ko ntáde tsiñu nto, ñá te da iña ña'a tsi.

⁸ Ini ntó tsi da xōó ka ña'a, te ña kade tsiñu ne, o tē tó'o tsiñu ne, ní'i ñā é vā'á nta'a Xuva ko kuēnta iña i é vā'a é kāde ña.

⁹ Divi ntō di, tó'o tsiñu, kuān koo vií nto nī ña ntáde tsiñu iña nto. Ñá ku kadā xení nto ni ñā. Naka'an ntō tsí io Tó'o nto ntuvi ntó ña, ña é tuví e dukún k̄n né, divi ñā ne, ñá kāde ña kuentá nee ñá'a ō.

Nté koo nada'an ña ntákuinti'xe i sán nima ña

¹⁰ Kaka'án u sá'a ni nto vē. Ntii na kōo nima nto ve, tsi ntáduku ntée nto Tó'o kō. Tsi dóo ió ntii ñā é ta'xi ña kō.

¹¹ Vata tsī ó kainúu sntadún san du'nu é kuvi káa ne, kuan tsī koo nakunúu nima nto Espíritu Xuva kō sán di, vata koo é ña kuvi vii Tó'o e ña vá'ā san ní nima nto é ncho kani nta'ví nto.

¹² Tsi ñá te ntánaa o nī ña é iō kúñu i ni x̄ki i, tsi ntánāa o ni tatsin ña vá'ā e dóo ntii inī i, e ntáde kú've iña ña ntaíka mi dóo neé ñuxiví sa, ni tatsin é ña vá'a é ntaíko e dukún k̄n.

¹³ Dukuān ne, ki'i nto un ntíí nt̄̄ nuu i é k̄ata'xi Xúva kō vata koo é kuvi vií nto nada'an ntō nima ntó te xēe ntúvi é k̄ini kaa san. Dá iō tu've vá'a nto ne, kutu kuntōo nto.

14 Dukuān ne, diin tsi kuntōo nto é nāki'ni kutu nto í'xi nto é nuu é ntaā í vatā o dé sntadún san ni ññí í'xi ña. Vii nto é vā'a vata koo é nada'an ntō nima ntó, vata tsī ó kanada'ān sntadún san nima ña é kaitavi núu ña du'nu káa san.

15 Vata tsī ó kaxio tú've dí'in nto e ntaxí'i nto ntí'xen nto ne, kuan kōo koo tú've nto é kika'an ntódo nto tú'ūn va'á san nté koo kūntóo vā'a ō.

16 Dií dií ka nuu á'vi ne, é kuintí'xe vā'a nto vata koo é nada'an ntō nima nto nuu i é kīni kaa é kanakuita ntēe tó'ō e ña vā'ā san ntó, vata tsī ó de sntadún san dá kakāta nteé ña le'e káa san vata koo é ña dúku ña ntuvē é kai'xí san.

17 Vata tsī o kaitávi dīkí sntadún san ññí e'xín ña ne, kuan tsi koo nada'an nto dīkí ntó di é kuintí'xe ntō tsi é nakākú Xuva ko ntō. Kunī'i nto káa kāni iña Espírítū di, é divī tú'un Xuva kō.

18 Da nēé ka é vii ntó ne, ka'an ntá'vī ntó ni Xuva kō. Kákan nto nta'a ña da nēé ka nuu i é kā'an Espírítu ñā é kákan nto. Ntító koo kuntōo nto. Ntē ña ku nátivi iní nto. Utén utén ka'an ntó ni Xuva ko iña é un ntí'í ntí'í ña ntáduku ntēe ña.

19 Ka'an ntá'vī ntó kuenta iñá ko di, na ta'xi Xuva ko tū'ún nee iña é kā'án u, vata koo é ña u'ví ko é kā'án u ni ñā'a iña tú'ūn va'á san é iō xu'ú iña ña.

20 Xuva ko taxnūu ña ko é kēte xaa u tú'un ñā né, dukuān é nuu kutū ú vevii. Ka'an ntá'vī ntó vata koo é ña u'ví ko nté un siin é kā'án u tú'un ña, vatā ó ntio ña é kā'án u.

I'a ntí'i tutú san

21 Tiquicu, ení kō e dóo ntio ko, ña e dóo xntíi kó tsiñu Xuva kō né, ntaa ña ni ntō é un ntí'i iñá ko, vata koo é kūtuni nto nté o de ú ne, nee tsiñu kade ú ve.

²² Dukuān né, kataxnūu ú ña é k̄'in ña mí ntoo nto vata koo é kā'an ñá ni ntō nté o de ntí, vata koo é na k̄í nima nto é vii ntó tsiñu Xuva kō.

²³ Na ta'xi Xuva ko ni I'xā ñá, Tó'o ko Jesūcristu, é kuntōo vá'a un ntí ntí ta'an kō, é kuīnima tá'an ña, é díi ka kuinti'xe ña.

²⁴ Na naxnuu viko Xuva ko ūn ntí ntí ña é ña ni xtuví mii i e ntákuinima i Tó'o ko Jesūcristu káni nima i. Kuan tsī koo é kā'án u ni ntō.

Tū'ún xuva kō vatā ó ntáka'an ña ñuú
Coatzospan
New Testament in Mixtec, Coatzospan
(MX:miz:Mixtec, Coatzospan)

copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

8f775598-56d9-56fd-966e-15e054d2f275